

Date – 05/07/2026

Time - 7:30 -7:40 Hrs

AKASHVANI AIZAWL

REGIONAL NEWS BULLETIN

HEADLINES (MORNING)

1. Mizoram sorkara cabinet minister hlui Pu F. Malsawma chu nizan khan a thi a, kum 78 mi niin Governor General (Rtd) Vijay Kumar Singh leh Chif Minister Pu Lalduhoma te chuan an sun thu an sawi.
2. Ramchhunga Special Intensive Revision kalpui mek state leh Union Territory zingah Mizoram chu Enumeration Form zaa za digitization zo hmasa ber a ni.
3. Vawiin hi Mizoram Presbyterian Kohhran ni pawimawh 'Damdawi In Pathianni' (Health Sunday & Hospital Sunday) a ni a, kohhran ho ten hun ruat bik an hmang dawn a ni.
4. United States hmarchhak lam chu khaw lum nasa takin a nuai mek a, FIFA World Cup match khelh tura inbuatsaihna pawh a tibuai hle.

<><><>

OBITUARY

Mizoram sorkara cabinet minister hlui Pu F. Malsawma chu nizan khan a thi a, kum 78 mi niin Governor General (Rtd) Vijay Kumar Singh leh Chief Minister Pu Lalduhoma te chuan an sun thu an sawi.

Larsap General VK Singh chuan thuchhuah siamin, Mizoram Minister hlui, Pu F. Malsawma'n min lo boral san ta chu pawh a tih thu a sawi a, Mizoramin hma lam a pan theih nan leh hmasawnna atâna a thawhrimna leh a inhlânna zawng zawngte chu zahawm a tih thu sawiin, hriat reng a ni tawh dâwn a ti.

Chief Minister Pu Lalduhoma pawhin sunna thu sawiin, Pu F. Malsawma chu Ram hruaitu tha, mi retheite hmangaih em em thin, nungchang mawi tak a ni a ti a. Kum 1978-ah Suangpuilawn bial atangin MLA ah thlan tlin a ni a, 1979 ah inthlan a awm leh khan a bial ngai atang hian a tling leh a. Minister mawhphurhna pek a ni a. Khatihlaia India rama Minister naupang ber zinga mi a ni tih sawiin, Mizoramah remna leh muanna a awm theih nan Minister a nihna a bansan a a ti a, remna kan neih theih nan khan a theihna zawng zawng a chhuah a ni, tiin a sawi.

Home Minister Pu K. Sapdanga, Health Ministert Pi Lalrinpuui leh Adviser to Chief Minister Pu TBC Lalvenchhunga te pawhin social media kaltlangin Pu F. Malsawma an ui thu leh an chhungte an tawrhpuui thu hi an sawi ve bawh a ni.

(June ni 29 (Thawhtanni chhun) khan Trinity Hospital, Silaimualah ah luh a ni na, ICU-ah dah luh nghal a ni a, thawk lamah harsatna a neih avangin July ni 1

zingkarah ventilator hman a ni. Scrub typhus, pneumonia, septicemia, chuap vung leh kal tha lo te a lo nei a. Hniam lam a pan zel avangin July ni 3-ah dialysis tih a ni a, Doctor te leh nurse ten theihtawp chhuahin enkawl mah se a natna te a lo nasat tawh em avangin nizan dar 7:30 bawr khan chatuan ram a pan ta a ni.)

<><><>

SIR DIGITIZATION

Ramchhunga Special Intensive Revision kalpui mek state leh Union Territory zingah Mizoram chu Enumeration Form zaa za digitization zo hmasa ber a ni.

Chief Electoral Officer Pi Garima Gupta-i'n a tarlan danin, SIR, 2026 Third Phase hi state 16 leh Union Territory 2 ah kalpui a ni a, an zingah hian Mizoram chu Enumeration Form zaa za digitization zo hmasa ber niin, June ni 25 khan zawh fel a ni.

Mizoram Assembly bial zingah Tuichang Assembly bial leh District zingah Khawzawl District te chu Mizorama enumeration form digitization zo fel hmasa ber an ni tih he hunah hian CEO chuan a sawi bawk a ni.

<><><>

HEALTH SUNDAY

Vawiin hi Mizoram Presbyterian Kohhran ni pawimawh 'Damdawi In Pathianni' (Health Sunday & Hospital Sunday) a ni a, kohhran ho ten hun ruat bik an hmang dawn a ni.

Chawhnu inkhawmah kohhran ten thupui atan 'TB Natna' tih ngaihthlak a ni dawn a, zan inkhawmah 'Hliam tuarte tana Samari mi tha nih' tih chu ngaihthlak leh a ni bawk ang.

Synod Hospital chuan sorkar tangka kum (financial year) liam ta 2025-26 chung khan Synod Hospital-a awm man pe thei lo leh pe tla thei lo mi 779-te chu cheng nuai 2,31 20,492 a peksak a; chung zinga za zel a 33.67 chu Presbyterian kohhran ni lo mi 256 tana a pek a ni.

Kum 1985 Synod Inkhawmpui thu angin 1988 atang khan January Pathianni hnunning ber chu Phâr Pathianni (Leprosy Sunday) atan hman thin a ni a. Kum 2004 Synod chuan phâr pual chauh ni lovin natna dangte pawh huamin 'Health Sunday' tiin a thlâk ta a. Kum 2006 atangin Health Sunday hi hman tan a ni a. Health Sunday-ah hian Hriselna lam thupui chi hrang hrang zir thin a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

MHIP DAY

Naktuka MHIP Day vawi 52-na lo thleng tur lawmna pualin MHIP General Hqrs hruaitute chuan nimin khan a bikin hmeichhe Raltlan te an tlawh.

MHIP General Hqrs hruaitute feh chhuak hian, Raltlan awmna Sihhmuiah Camp 2, Sairang Camp leh Chawnpui camp a hliah leh damlo enkawlina hmun te an tlawh a. Hmeichhia te mamawh sanitary napkins leh eitur hrang hrang an hlan a ni. Aizawl city area-a MHIP Branch hrang hrangte pawisa thawhkhawm atanga Raltlante hi tlawh leh tanpui a ni.

MHIP General Headquarters General Secretary Prof Irene Lalruatkimi chuan thuchhuah siamin, July ni 6 chu kum tin Mizorama tlawmngai pawl chak leh thawh hlawk, Mizo Hmeichhe Insuihkhawm Pawl (MHIP) te hnathawh hlu tak hriatpui nan 'MHIP Day' atan hman a ni thin a ti a. Mizo hmeichhia tawh phawt chu a member an ni tih sawiin, MHIP hian hmeichhiate dinhmun chawikan te, hmasawmna leh an tana thil tha ber duhsakna kawngah Mizoram chhungah hma an la thin a ni a ti bawh.

Naktuk hian Mizoram hmun hrang hrangah MHIP day hi hlim leh lawm taka hmang turin ruahmanna siam a ni.

<><><>

WORLD CUP

Football inelna ngaihhlut ber FIFA World Cup 2026 nizan atang khan Round of 16 khelh tan a ni a, inkhel hmasa berah Morocco chuan si thum faiin Canada an hneh - Canada hi inelna thlengtu ram pathum zinga pakhat an ni a, a thlengtu dang USA leh Mexico te chu an la dam a ni.

Tukin zing inkhelah France chuan goal khat faiin Paraguay an hneh ve bawh a, quarterfinal an inhlangkai a ni. France leh Morocco te hi quarterfinal-ah an inhmachhawn ve leh ang.

Naktuk zing lam dar 1:30 hian Brazil leh Norway an inkhel dawn a, naktuk zing dar 5:30 hian Mexico leh England te an inkhel leh bawh ang.

<><><>

Heatwave in US

United States hmarchhak lam chu khaw lum nasa takin a nuai mek a, FIFA World Cup match khelh tura inbuatsaihna pawh a tibuai hle. Khawlum tehmaah degree 46°C aia sang tura ngaih a nih avangin United States-a mipui tamna ber, New York City chuan a hmaa a la awm ngai lo khaw lum tur atan a inbuatsaih mek a ni. New York khawpui thuneitute chuan khaw lum lutuk hi sutkian nan hmalakna hrang hrang an kalpui a, vantlang in tam tak chu cooling centre-a siam te, mi harsa zawkte pui turin tlawmngaipawl dah te, khawpui chhunga vantlang swimming pool hawn hun pawhsei

US National Weather Service chuan, boruak lum chu Boston-ah degree 41°C, Philadelphia-ah degree 44°C leh Washington-ah degree 45°C a

thleng thei tih a sawi. Agency chuan Independence Day lawm na ni chu a lum ber tum ni dawn niin a tarlang a, an hriat tawha khua lum ber tum niin an ngai a, la lum belh zual zel thei ni te pawn a rinawm thu an sawi.

<><><>